

# Ibu sebak terima ijazah

## mendiang anak

MINGGUAN MALAYSIA (DARAH NEGERI)

KUANTAN 18 Nov. - Perasaan sebak bercampur bangga dirasakan oleh seorang ibu ketika mewakili mendiang anaknya pada Majlis Konvokesyen Universiti Malaysia Pahang (UMP) Ke-12 di Dewan Kompleks Sukan UMP Kampung Gambang di sini, hari ini.

P. Shoba, 51, menerima Ijazah Anumerta UMP bagi pihak anaknya, N. Kamalanathan, 23, graduan Sarjana Muda (Kepujian) Kejuruteraan Kimia universiti tersebut yang meninggal dunia akibat kemalangan jalan raya di Kuala Krai, Kelantan September lalu.

Pernangku Raja Pahang, Tengku Abdullah Sultan Ahmad Shah berkenan mengurniakan ijazah berkenaan secara anumerta kepada Shoba di dalam kamar selepas selesai sidang pertama majlis konvokesyen berkenaan dengan disaksikan Naib Canselor UMP, Prof. Datuk Dr. Daing Nasir Ibrahim.

Shoba ketika ditemui berkata, dia berbangga mewakili mendiang Kamalanathan pada majlis berkenaan namun terkilan tidak dapat menyaksikan anaknya itu

19/11/17 (AHAD)

NIS: 16

menaiki pentas konvokesyen.

"Selepas kematian suami pada 20 Julai lalu akibat sakit jantung, kami sekeluarga menaruh harapan kepada Kamalanathan untuk membawa kami keluar dari kemiskinan memandangkan dia adalah anak lelaki tunggal dalam keluarga," ujarnya.

Shoba yang bekerja sebagai penoreh getah di sebuah estet di Kuala Krai berkata, mendiang anaknya itu seorang yang taat kepada keluarga dan rajin mengulang kaji pelajaran.

Katanya, cita-cita mendiang untuk menjadi seorang jurutera tidak tercapai selepas terlibat dalam kemalangan jalan raya selepas motosikal yang ditunggangnya bertembung dengan sebuah kenderaan pacuan empat roda.

"Meskipun terkilan dengan pemergian mendiang, namun saya tetap berbangga kerana hari ini dapat menggenggam Ijazah Sarjana Muda (Kepujian) Kejuruteraan Kimia milik anak saya yang berjaya menamatkan pengajian di UMP dengan cemerlang," ujarnya.



P. SHOBA (kiri) menunjukkan ijazah Sarjana Muda Kejuruteraan Kimia yang diterima bagi pihak mendiang anaknya, N. Kamalanathan sempena Majlis Konvokesyen UMP Ke-12 di Gambang, Pahang, semalam.